

*sur.*

EDICT DV ROY,  
sur le faict des Duels  
& rencontres.

*fevrier 1626.*

*Publié en Parlement le 24.*

*Mars 1626.*



A PARIS,

Chez C. MOREL, & P. METTAYER,  
Imprimeurs ordinaires du Roy.

M. DCXXVI.

*Avec Privilege de sa Maieſte.*





OVIS par la grace de Dieu,  
 Roy de France & de Nauar-  
 re, A tous presens & à venir,  
 Salut. Comme il n'y a rien qui viole  
 plus sacrilegement la loy de Dieu que  
 la rage effrenée des duels, ny qui soit  
 plus contraire à la conseruation & au-  
 gmentation de nostre Estat, en ce qu'il  
 se perd par cette fureur grand nom-  
 bre de nostre Noblesse qui en est vne  
 des principales colonnes, Aussi Nous  
 auons iusques icy recherché tous les  
 moyens à Nous possibles pour en  
 arrester le cours par la terreur des  
 peines rigoureuses, & chastimens  
 exemplaires, imposez à ce crime  
 par nos precedens Edicts: Mais d'au-  
 tant que la qualité desdites peines est  
 telle qu'aucuns de ceux qui ont l'hon-

A ij

neur d'approcher plus près de nostre personne, ont pris souuent la liberté de nous importuner pour en moderer la rigueur en diuerſes occasions : Ce qui a faiët que les coupables qui ont par cette faueur & conſideration obtenu ſur ce nos Lettres d'abolition, ſont demeurez entierement impunis contre nostre intention, & que d'ailleurs par la cōceſſion de ces premieres graces particulieres nous auons eſté n'agueres d'autant plus obligez de deferer à l'inſtante priere qui nous en a eſté faiëte de la part de nostre treschere & bien amee ſœur, la Royne de la grande Bretagne ſur le point & en conſideration de ſon mariage, & des graces, allegreſſes & contentement public qu'en ont deu receuoir tous les peuples de nos Royaumes, d'accorder vne abolition generale de tous leſdits crimes pour le paſſé. Deſirant reme-

dier & pouruoir de nouveau à ce que telle fautes ne se commettent cy après sur l'esperance d'impunité, & mesme preuenir & empescher la licence & l'effect de toutes les prieres ou importunitéz qui nous pourroient estre faites pour exempter les coupables du chastiment qu'ils auront merité, Nous sans reuoquer nos precedens Edicts pour l'aduenir, Auons aduisé & resolu d'establir & imposer nouuelles peines, d'autant plus conuenables aux fins que nous nous proposons, qu'estans moins rigoureuses il sera moins loisible de nous requerir & importuner pour en descharger les coupables, qui n'en pourront iamais estre dispensez pour quelque cause & par quelque voye que ce puisse estre.

I.

A ces causes de l'aduís de la Royne nostre tres-honoree Dame & me-

A iij

re, nostre tres-cher & bien amé frere  
 le Duc d'Anjou , Princes de nostre  
 sang, autres Princes Officiers de no-  
 stre Couronne, & autres principaux  
 de nostre Conseil, Nous auons en la  
 faueur & consideration de nostre  
 tres-cher & bien amée sœur la Roy-  
 ne de la grande Bretagne, remis, quit-  
 té, pardonné & aboly: remettons, quit-  
 tons, pardonnôs & abolissons, les cas &  
 crimes commis par cy deuant contre  
 nosdits Edicts des duels & rencontres:  
 Remettons les coupables en leur  
 bonne fame & renommee & en leurs  
 biens, mesmes ceux ou heritiers d'i-  
 ceux contre lesquels seroient interue-  
 nus Arrests de condamnation en nos  
 Cours Souueraines par defauts & con-  
 tumaces, & imposons sur ce silence  
 perpetuel à nos Procureurs Gene-  
 raux, leurs Substituts & tous autres,  
 sans preiudice toutefois des dons par

nous faits des confiscations à nous acquises , & à la charge que ceux qui s'estans battus auront tué, & sont encore à present vius, seront tenus de prendre Lettres particulieres d'abolition de Nous, les faire enregistrer en nos Parlemens, & de satisfaire aux parties ciuiles s'il y eschet. Ordonnons que tous ceux qui tomberont à l'aduenir dans ce crime soient appelans ou appelez, nonobstant quelques Lettres de grace ou pardons qu'ils puissent obtenir de Nous par surprise ou autrement, demeureront dès lors priuez de toutes leurs charges s'ils en ont, auxquelles à l'instant sera par nous pourueu, & pareillement descheus de toutes pensions & autres graces qu'ils tiendront de nous, sans esperance de les recouurer iamais, & qu'en outre ils seront punis selon la rigueur de nos Edicts precedens , ainsi que les Iuges

verront que l'atrocité des crimes & circonstances d'iceux le pourront mériter : laissant à la religion de nosdits Iuges d'infliger plus grandes peines selon qu'ils iugeront en leurs consciences, sans neantmoins que la moderatiō des peines cy après exprimees, se puisse estendre sur ceux qui contreuenans à cet Edict auront tué, auquel cas nous entendons que la rigueur de nos precedens Edicts ait lieu.

## II.

Et en cas que ceux qui nous auront contrains de les priuer de leurs charges s'en ressentent enuers ceux que nous en aurons pourueus, & les appellent ou excitent au combat, soit par eux mesmes ou par autrui, par rencontre ou autrement, Nous voulons que telles gens & ceux dont ils se serviront soient degradez de Noblesse, declarez infames & punis de mort, sans pouuoir



pouuoir iamais estre releuez desdites peines par aucunes de nos Lettres, auxquelles nous defendons tres-expressément à nos Officiers d'auoir esgard, si tant est que par surprise ou autrement ils vinsent à en obtenir.

### III.

Voulons aussi que le tiers des biens des appellans & appelez demeure confisqué, moitié aux Hospitaux qui seront establis dans les Prouinces pour les soldats estropiez dont nous chargeons nos Procureurs Generaux, leurs Substituts, & tous ceux qui auront charge de l'administration desdits Hospitaux, de faire soigneuse recherche & poursuite, à peine d'en répondre en leur nom : en consideration de quoy Nous ordonnons que leur action dure pour le temps & espace de vingt ans, quand mesme ils ne feroient aucune poursuite qui la peut proroger, &

l'autre moitié applicable à nous pour en disposer, soit en faueur desdits Hospitaux ou autrement, ainsi que nous verrons bon estre, le quart de nostre-dit demy tiers prealablement pris pour les delateurs: Et au cas que lesdits coupables fussent trouuez dans nostre Royaume pendant les trois ans de leur bannissement, Nous voulons qu'un autre tiers de leur bien soit pareillement confisqué pour la susdite contrauention & infraction de leur ban, applicable comme dessus, moitié à nous, & l'autre moitié ausdits Hospitaux, le quart du premier demy tiers prealablement pris pour les delateurs, & qu'en outre à la diligence de nos Procureurs Generaux ou leurs Substituts sur la premiere delation qui leur en sera faicte ou aduis à eux dōné desdites infractions de ban, les coupables soient mis & retenus prisonniers

iufques à la fin dudit banniffement : enjoignant pour cet effect aux Gouverneurs, Lieutenans Generaux, Bailiffs, Senefchaux, Gouverneurs particuliers de nos villes, & Preuofts des Mareschaux, de leur donner main forte à l'execution de ce que deffus, toutesfois & quâtes qu'ils en feront requis.

## IV.

Et bien que les appellans & appelez esdits duels foient tous coupables, ce luy qui prouoque eftant principal auteur du crime de tous les deux, Nous voulons qu'outre les peines cy deffus fpecificées, tout appellant ait trois ans de banniffement, & qu'au lieu d'un tiers de fon bien, il en perde la moitié, applicable comme deffus, fans preiudice auffi de plus grande peine, fi nos Iuges ordinaires iugent l'atrocité du cas le meriter.

## V.

Et pource qu'il eft diuerfes fois ar-

riué qu'aucuns pour euitier la rigueur  
 des peines que nos Edicts imposent à  
 tels crimes, ont recherché l'occasion  
 de se rencontrer pour couvrir le des-  
 sein premedité qu'ils auoient de se  
 battre, Nous voulons & ordonnons  
 que si ceux qui auront eu querelle, dif-  
 ferens, ou prétenduë offense de part &  
 d'autre, viennent à se rencontrer, & se  
 battre seuls ou en pareil estat & nom-  
 bre de part & d'autre, à pied ou à che-  
 ual, l'agresseur soit subiet aux mesmes  
 peines & rigueurs, tant de nostre pre-  
 sent Edict que des precedans, encores  
 que d'ailleurs il ne fut pas verifié que  
 son dessein fut premedité : & où l'a-  
 gression ne se pourra prouuer Nous  
 entendons que lescdites deux parties  
 soient également chastées, sauf s'il ar-  
 riuoit combat en d'autres rencontres  
 de nombre inegal & sans precedente  
 aigreur à proceder contre les seuls a-

gresseurs & coupables, & les punir par  
les voyes ordinaires.

## VI.

D'autant aussi qu'ils est trouué d'autres nos subiets qui ayas pris querelles en nostredit Royaume, & s'estans donnez rendez-vous pour se battre hors ou sur les frontieres d'iceluy, ont estimé par ce moyen pouuoir eluder l'autorité de nos Edicts, Nous voulons que ceux qui tomberont en telles fautes soient poursuiuis tât en leurs biens durant leur absence, qu'en leurs personnes apres leur retour, tout ainsi & en la mesme sorte que ceux qui contreuiendront à ce nostre present Edict sans sortir de nostre Royaume, les iugeans mesme plus punissables en ce que le temps qu'ils prennent, leur donât lieu de cognoistre leur faute, la surprise & les premiers mouuemens qu'on a dans la chaleur d'une offense frai-

chement receuë ne les peut excuser.

# VII.

Et quoy que nous estimions que la publication de cestuy nostre present Edict que nous voulons à l'aduenir estre inuiolable, empeschera tous nos subiects de tomber es fautes, contre lesquelles il est fait, si toutesfois il arriuoit qu'ils fussent si miserables que de ne s'en abstenir pas, & que non contents de commettre tels crimes si enormes deuant Dieu & les hommes, ils y attirassent & engageassent encores d'autres personnes, dont ils se seruiroient pour seconds, tiers, ou autre plus grand nombre, ce qui ne peut estre fait par aucuns, que pour chercher laschement dans l'adresse ou le courage & secours d'un tiers, la feureté de leurs personnes, qu'ils veulent exposer par vanité contre leur deuoir, sous ceste seule confiance. Nous vou-

lons que ceux qui se rendront coupables à l'aduenir d'une telle & si criminelle lascheté, soient irremissiblement punis de mort, suiuant la rigueur de nos premiers Edicts, & des à present declarons les appellans & appelez qui se seruiron desdits seconds, tiers, ou autres, innobles, eux & leur posterité decheus de toute noblesse, & incapables de toutes charges pour iamais, sans que nous ny nos successeurs les puissent reestabli & leur oster la note d'infamie, que iustement ils auront encourue, tant par l'infraction de nos Edicts, que par leur lascheté: Nonobstant toutes lettres de grace & de remission qu'ils puissent obtenir de nous au contraire, par surprise ou autrement: lesdits seconds ou tiers, neantmoins demeurans seulement sujets aux mesmes peines des appelez, sinon qu'eux mesmes eussent fait l'appel, auquel cas

ils seront punis des peines portees par ce present Edict contre les appellans.

### VIII.

Nous voulons en outre & ordonnons que ceux qui possèdent des biens à vie seulement sans aucun droict de propriété, soient pour l'infraction du present Edict, outre les peines de ban portees cy dessus, au moins priuez pour cinq ans des deux tiers de leur reuenu, applicable moitié ausdits Hospitaux & moitié aux autres œuures pies, selon nostre disposition, sans prejudice de plus grandes peines si les cas le meritent. IX.

Que tous les enfans de famille qui seront conuaincus de telles fautes outre les peines de priuation de toutes les charges, pensions & incapacité d'en tenir à l'aduenir, au lieu de trois ans de bannissement portez cy dessus, soient retenus autant de temps estroittement prisonniers. X. Et



par  
ns.  
n-  
is  
c  
1  
1  
Et afin que nostre present Edict  
soit plus inuiolablement obserué,  
Nous voulons que la mort soit irre-  
missiblement infligée à tous ceux qui  
pour la seconde fois viendront à le  
violier, comme appellans, de quelque  
qualité & condition qu'ils puissent  
estre.

## XI.

Or bien que les crimes susdicts  
soient detestables en toutes sortes de  
personnes, y en ayans neantmoins  
ausquels par diuerfes considerations  
ils sont plus horribles, & requierent  
par consequent vne particuliere, &  
plus grande peine que les autres, com-  
me és personnes qui les commettent  
enuers ceux qui les ont nourris & esle-  
uez, qui ont esté leurs Tuteurs, qui  
sont leurs Seigneurs de fief, qui ont  
esté leurs Chefs, & leur ont comman-

dé, & spécialement quand leurs querelles naissent pour des subjects de commandement, chastiment ou autre action passée durant qu'ils auront esté soubz leur charge, Nous voulons & ordonnons que les coupables desdicts crimes soient sans diminutió des peines, cy dessus punis en outre en leurs personnes suiuant la rigueur de nos Ordonnances & precedés Edicts.

## XII.

Et s'il arriue qu'il y ait eu appel duel ou combat, Nous voulons que la cognoissance & iugement en appartienne à nos Cours de Parlement, pour ce qui sera arriué es Villes où elles sont sceantes, aux enuirós d'icelles, ou bien plus loing entre personnes de telle qualité & importance qu'ils iugent y deuoir interposer leur autorité, & hors ces cas à nos Iuges ordinaires à la charge de l'appel : Auec

defenses à nostre grand Preuost, ses Lieutenans & tous autres nos Preuosts, Lieutenans de robbe courte, & autres Iuges extraordinaires d'en cognoistre, quelque attribution ou adresse qui leur en peust estre faicte, declarant desapresent telles procedures nulles & de nul effect.


### XIII.

Or parce que ce n'est rien de faire des Loix si on ne les fait religieusement, & inuiolablement obseruer, pour rendre les peines specifiees par le present Edict plus certaines & inuitables, & oster toute esperance de grace & de faueur, Nous declarons deuant Dieu & les hōmes à la descharge de nostre conscience, que nous auons solennellement promis qu'encores que pour autres considerations, ou par importunité, nous nous peussions cy-deuāt estre relachez en quel-

ques occasions particulieres, de remettre les peines de nos Edicts precedens, Nous n'accorderons iamais sciemment aucunes lettres pour remettre celles du present Edict, que nous auons faict iurer en nos mains aux Secretaires de nos Commandemens de n'en signer aucunes, & à nostre tres-cher & feal Chancelier de n'en point seeller, quelque expresse inionction ou commandement qu'ils en puissent recevoir de nostre part: ains refuser absolument tous ceux qui poursuiront telles graces, nonobstant qu'ils exposent les faits comme douteux, & les deguisent pour les faire paroistre rencontre inopinée. Que nous tiendrons nos Conseillers pour preuaricateurs si iamais ils consentent au contraire, & manquent à nous aduertir en gens de bien de ce à quoy nous nous obli-

geons par le present Edict: Que nous auons defendu & defendons à toutes personnes de quelque qualité & condition qu'elles soyent, de nous faire aucune priere au contraire, en declarant infracteurs de nos Loix, ennemis de nostre reputation, & indignes de nostre bonne grace, tous ceux qui mediatement ou immediatemēt l'oseroiēt entreprendre. Et pour empescher que les coupables ne recoiuent aucune faueur ou assistance, nous defendons à toutes personnes de quelque condition qu'elles puissent estre, de donner retraicte aux contreuenans à ce present Edict, à peine d'estre bannis pour vn an de nostre Court: Et partant si aucunes Lettres contraires se trouuoient cy apres expedies, pour quelque cause & sous quelque pretexte que ce soit, nous voulons qu'elles soyent nulles & de nul effect,

C iij



comme données par surprise, contre nostre intention & nostre foy: Faisans tres-expresses defenses à tous nos Iuges & Officiers auxquels elles seroient adressées, d'y auoir aucun esgard, sur les mesmes peines que dessus.

### XIIII.

Et d'autant que quelques vns se voyans appelez se pourroient engager au combat, non par seule fureur & passion brutale, comme il arriue souuent, mais par la crainte d'estre soubçonnez de manquer de valeur & de courage s'ils refusoient d'y aller: pour leuer ceste vaine apprehension, & en outre recompenser le merite & sagesse de ceux qui conduits par la raison, par l'amour & crainte de Dieu, ou par vn desir religieux d'obeyr à nos Loix, refuseront le duel estans appelez, & se reserueront à employer leur courage aux occasions legitimes

qu'il peuvent requerir, pour le bien de nostre service, & l'aduantage de nostre Estat, Nous declaronz que nous reputons & reputerons toujours tels refus pour marques & tesmoignage d'une valeur bien conduite, digne d'estre employée par nous aux charges militaires, & plus honorables & importantes: Comme nous promettons & iurons deuant Dieu de les en gratifier tres-volontiers, quand les occasions s'en offriront.

## X V.

Et afin que ceux qui sont offensez ou croient l'estre, ne se laissent transporter à la fureur de ce crime, sous couleur de ne pouuoir retirer satisfaction des iniures qu'ils pretendroient auoir receuës: Nous enioignons aux Officiers de nostre Couronne qui se trouueront plus proches de l'offensant,

& aux Gouverneurs & Lieutenáns Généraux de nos Prouinces, Capitaines & Gouverneurs particuliers de nos Villes & Chasteaux, que dans l'estenduë de leurs charges, sur les aduis qu'ils auront des differens suruenus entre ceux qui y font profession des armes, ou sur les plaintes qui leurs seront faites par les offensez, ils mandent & font venir aussi tost deuant eux les offensez, pour avec l'aduis de deux ou trois Gentils-hommes voisins, sages & bien sensez, ordonner vne satisfaction si honorable à l'offensé que il ayt subiect d'en demeurer content : estant necessaire pour empêcher l'insolence de ceux qui offensent trop legerement, de les chastier par des reparatiós aussi rigoureuses à ceux qui les font, qu'honorables à ceux qui les reçoient. Et au cas que l'un ou l'autre ne veuille deferer à ce qui par  
eux



eux aura esté arresté, ils seront par nos-  
 dicts Gouverneurs, Lieutenans Gene-  
 raux & Officiers susdits; réuoyez par-  
 deuant nos tres-chers & bien amez  
 Cousins, les Connestable & Mare-  
 schaux de France, estant prés nostre  
 personne, ou aux Prouinces dans les-  
 quelles tels cas pourroient estre arri-  
 uez, Ausquels nous donnons de nou-  
 uveau toute autorité de decider & iu-  
 ger absolument tous differends de ce-  
 ste nature sur le point d'honneur, &  
 reparation d'offense, soit qu'ils soient  
 arriuez dans nostre Cour, ou en quel-  
 que autre endroict de nostre Royau-  
 me que ce puisse estre. Entendons  
 toutesfois que pour les differents arri-  
 uez en nostre dite Court, & suite, nos-  
 dicts Cousins les Connestable & Ma-  
 reschaux de France qui s'y trouuer-  
 ront en prennent les premiers co-  
 gnoissance, & pouruoyent selon l'or-  
 D

dre susdict à tout ce qui sera besoin, sans neantmoins que les offensez, ou pretendans l'estre, lesquels pour les reparations desdictes offenses, soit à l'honneur, biens, ou autre interest, en voudront faire leur plaincte & poursuite par deuant nos Iuges ordinaires, en puissent estre empeschez, ny appelez pour ce à la requeste des offensans deuant nosdicts Cousins les Mareschaux de France, Lieutenans ou Gouverneurs de nos Prouinces, deuant lesquels ils seront seulement tenus de respondre aux plainctes que l'on voudroit faire d'eux, sans prejudice de leurs actions iuridiques.

## XVI.

Et au cas que lesdictes parties offensantes refusent de subir le iugement desdicts Gouverneurs de nos Prouinces & Villes, ou en leur absence de leurs Lieutenans, Et que sur ce

elles ne se pouruoyent pas sur le ren-  
 uoy pardeuant nos Cousins les Con-  
 nestable, & Mareschaux de France:  
 Nous enioignons ausdicts Gouver-  
 neurs & Lieutenans de les faire pour-  
 suiure, & apprehéder par les Preuosts  
 de nosdicts Cousins, les Mareschaux  
 de France, & les contraindre par tou-  
 tes voyes de subir le iugement qu'ils  
 auront donné, voire mesme les met-  
 tre & retenir en prison, iusques à ce  
 qu'elles y ayent satisfait, & les con-  
 demner à l'amende, & autres peines  
 qu'ils iugeront raisonnables pour la  
 reparation de la desobeissance & du  
 retardement.

## XVII.

Et pour leur donner moyen de ter-  
 miner facilement tous differends de  
 ceste nature, & de faire reparer toute  
 iniure, Nous nous obligeons d'accor-  
 der sur leurs aduis, tout ce que nostre

D ij

cōsciēce nous pourra permettre pour la satisfaction des offensez : Voulans que tout ce qu'ils prononceront touchant le point d'honneur & reparation d'offense , soit si religieusement executé de toutes parts , que si quelqu'une des parties vient à y manquer , outre les peines de prison & autres qu'ils leur pourront imposer , ils soyent descheus des priuileges de Noblesse. Enioignans pour cet effect à nos Esleus, Officiers & Assesseurs des Tailles, de les comprendre au roolle d'icelles, & les taxer selon leurs facultez , sans vser d'aucune conniuece ny retardement , si tost qu'ils auront veu les Iugemens rendus par nosdicts Cousins les Connestables & Mareschaux de France , & autres de nos Gouverneurs & Officiers cy dessus mentionnez : Sur peine ausdicts Esleus & autres Officiers de nosdites

**T**ailles de priuation de leurs charges,  
 & d'en respondre en leur propre &  
 priué nom, le tout comme dict est,  
 sans preiudice des actions ciuiles que  
 les vns & les autres pourront auoir à  
 intenter ou poursuiure deuant les Iu-  
 ges ordinaires, par l'ordre & les for-  
 mes iuridiques. Lesquelles neârmoins  
 nous exhortons nosdicts Cousins &  
 autres qui seront employez au iuge-  
 ment des querelles & offenses, de  
 composer & accorder amiablement  
 autant qu'il se pourra faire, pour oster  
 toute occasion au renouvellement des  
 aigreurs & animositez qui produi-  
 sent ces accidens funestes.

### XVIII.

Et d'autant que par la negligence  
 de nos Officiers susdicts, lesquels nous  
 voulons vaquer assiduément à ter-  
 miner les querelles qui naistront entre  
 nostre Noblesse & autres gens faisans

D iij

profession des armes, où par la con-  
 niuence dont ils pourroient vsfer pour  
 fauoriser l'vne des parties, il pourroit  
 arriuer que nostre intention n'auroit  
 pas l'effect que nous desirons, veu que  
 l'exécution d'icelle depend de leur  
 soin & de leur vigilance, Nous enioi-  
 gnons & tres-expressement commã-  
 dons tant à tous nosdicts Cousins les  
 Connestable & Mareschaux de Fran-  
 ce, que Gouverneurs & Lieutenans  
 generaux desdites Prouinces, de tenir  
 la main exactement & diligemment  
 à l'obseruatió de nostre present Edict,  
 sans permettre que par faueur, con-  
 niuence & autre voye, il y soit con-  
 treuenue en aucune sorte & maniere.

**SI DONNONS EN MANDE-  
 MENT** à nos amez & feaux Cõseil-  
 lers les gens tenans nos Cours de Par-  
 lemens, Baillifs, Seneschaux & autres  
 nos Iusticiers & Officiers qu'il appar-

tiendra, que le contenu en ces presentes, ils facent lire, publier & enregistrer, garder & observer, gardent & observent inuiolablement, & sans l'enfreindre : **CAR** tel est nostre plaisir. Et afin que ce soit chose ferme & stable à tousiours, nous auons signé ces presentes de nostre propre main, & à icelles faict mettre & apposer nostre seel, sauf en autre chose nostre droict, & l'autrui en toutes. **DONNE** à Paris au mois de Feurier, l'an de grace mil six cens vingt six. Et de nostre regne le seiziesme, Signé, **LOUIS**. Et plus bas, Par le Roy, **DELOMENIE**. Et à costé, **VISA**. Et seellé du grand seau de cire verte, sur lacs de foye rouge & verte.

Et plus bas est escrit:

*Leuës, publiées & registrées, ouy & requérant le Procureur general du*

Roy, pour estre executées, gardées & observées selon leur forme & teneur, & coppies collationnées d'icelles enuoyées aux Bailliages & Seneschaußées de ce ressort, pour y estre pareillement levées, publiées, registrées & executées à la diligence des Substituts dudit Procureur general, ausquels enjoinct d'y tenir la main, & d'en certifier la Cour auoir ce fait au mois. A Paris en Parlement le vingt-quatriesme Mars mil six cens vingt six.

Signé, DV TILLET.

